

每週經課朗誦經文(巴克禮漢羅/教羅)2014/11/30

共同經課 - 1 以賽亞書六十四章一節~九節

1 願你裂開天來降臨，hō chiah-ê 山振動 tī 你 ê 面前，2 (親像火燒乾柴，親像火 hō 水滾)，hō 祢 ê 對敵知祢 ê 名，hō 列國 tī 祢 ê 面前 ngiâu-h-ngiâu-h-choah。3 祢 bat 行 thang 驚 ê 事，阮所無 phah 算，hit 時祢降臨，chiah-ê 山振動 tī 祢 ê 面前。4 Tùi 古早以來人 bē-bat 聽見，耳孔 bē-bat 聽見，目矙 bē-bat 看見，tī 祢以外有甚麼上帝，為 tiòh thèng 候伊 ê 人行 tãi-chì。5 祢迎接 hit-ê 歡喜行義，kap 記念祢 ê 道路 ê 人；看 ah，你 bat 受氣，阮 bat 犯罪，親像 án-ni 已經久，阮 iáu 能得 tiòh 救 mah？6 阮 lóng 親像無清氣 ê 人，所有 ê 義 lóng 親像污穢 ê 衫；阮 lóng 親像樹葉漸漸乾去；阮 ê 罪過親像風 kā 阮吹去。7 Koh 無人求叫祢 ê 名，無人出力擒 tiâu 祢；因為祢掩面 m̄ 看阮，hō 阮因為阮 ê 罪過致到消無。8 耶和華 ah，taⁿ 祢猶原是阮 ê 父；阮是土，祢是燒磁師傅，阮 lóng 是祢 ê 手所造 ê。9 耶和華 ah，祢 m̄-thang 大受氣，亦 m̄-thang 永遠記念罪過；求祢俯落來看，阮 lóng 是祢 ê 百姓。

共同經課 - 2 詩篇八十篇一節~七節，十七節~十九節

1 A-sat ê 詩；交 hō 樂官；調用「做干證 ê 百合花」。1) 以色列 ê 牧者 ah，chhoā 約瑟親像羊群 ê，求你 aⁿ 耳孔聽；坐 tī ki-lō 兵 ê 頂面 ê，求你發出你 ê 光。2 Tī Í-hoat-liàn、便雅憫、Má-ná-se ê 面前，展出你 ê 權能，來救阮。3 上帝 ah，hō 阮 tò-tng；Hō 你 ê 面發出光，阮就得 tiòh 救。4 萬軍 ê 上帝耶和華 ah，你 òng 你 ê 百姓 ê 祈禱發出受氣，beh joā 久 ah？5 你用目屎做食物，hō in 食；Koh 量 choē-choē 目屎 hō in lim。6 你 hō 隔壁國因為阮來相爭，阮 ê 對敵相 kap teh 笑。7 萬軍 ê 上帝 ah，hō 阮 tò-tng，Hō 你 ê 面發出光，阮就得 tiòh 救。

共同經課 - 3 哥林多前書一章三節~九節

3 願 lín 對咱 ê 父上帝 kap 主耶穌基督得 tiòh 恩典平安。4 我常常替 lín 感謝我 ê 上帝，是為 tiòh 上帝 ê 恩典 tī 耶穌基督 bat 賞賜 lín ê，5 因為 lín tiàm-tī 伊 ták 項 tãi-chì 富足，口才知識無 m̄ 齊備，6 親像基督 ê 干證得 tiòh 堅固 tī lín ê 中間；7 致到 lín tī chiah-ê 恩賜無一項無夠額，來 thèng 候咱 ê 主耶穌基督 ê 顯現；8 伊也 beh 堅固 lín 到路尾，tī 咱 ê 主耶穌基督 ê 日無 thang 嫌。9 上帝是信實，lín tùi 伊受召來 kap 伊 ê Kiáⁿ 咱 ê 主耶穌基督結聯。

共同經課 - 4 馬可福音十三章二十四節~三十七節

24 當 hiah-ê 日，hit-ê 患難 ê 了後，日 beh 烏暗，月無出伊 ê 光，25 星 tùi 天 ka-lauh，tī 天裡 ê 象 beh 振動。26 Hit 時 beh 看見人子用大權能 kap 榮光，tī 雲中臨到。27 Hit 時伊 beh 差伊 ê 天使 tùi 四方聚集伊所揀 ê 百姓，tùi 地極到天邊。28 Lín tiòh 學無花果樹 chit-ê 譬喻；當枝軟葉發 ê 時，lín 就知夏天近 lah。29 Án-ni lín 看 chiah-ê 事，tiòh 知是近，到門口 lah。30 我實在 kā lín 講，Chit 世代 iáu-bē 過去，到 chiah-ê tãi-chì lóng 成。31 天地 beh 廢無，我 ê 話 boē 廢無。32 但是論 hit 日 hit 時人 m̄ 知，tī 天裡 ê 天使也 m̄ 知。Kiáⁿ 也 m̄ 知，獨獨父知伊。33 Tiòh 謹慎警醒來祈禱，因為 lín m̄ 知 hit-ê 期是 tī 甚麼時。34 是親像一人離開伊 ê 家，去出外，將權交代伊 chiah-ê 奴僕，有派工 hō ták 人做，koh 吩咐顧門 ê tiòh tiuⁿ-tí。35 所以 lín tiòh tiuⁿ-tí，因為 lín m̄ 知 lín ê 主甚麼時 beh 來，或是日暗，或是半暝，或是雞啼，或是天光早；36 驚了伊忽然來 tú-tiòh lín teh 睏。37 我所 kā lín 講 ê，也 kā 眾人講，Tiòh tiuⁿ-tí。